

Molitaofi o Taaloga Vitio

Saunia e Maryssa Dennis
O Mekasini a le Ekalesia
(E faavae i se tala moni)

O le a se mea e mafai ona fai e
Natano e oo ai i le lanumeamata?



Na matua oomi e tamai-
lima a Natano ia ki o le
taaloga. Sa matua latalata lava
o ia i le malo i lenei tulaga! Sa sioa
atu o ia i le TV a o 'alo lana vaa roketi mai pomu
lanumeamata.

"Natano, taimi mo le meaai o le afiafi!" O le valaau
lea a Tina.

Pa! Na lavea le vaa a Natano. Sa oi Natano. O lea
la ua tatau ona ia toe amata. Ae sa ia iloa e mafai
ona ia faatoilaloina lenei vaega pe afai na te toe
taumafai tasi lava.

Sa sau Tama i totonu o le potu. "Na e lagona mai
Tina? Ua oo i le taimi e aai ai."

Sa mapuea Natano ma taofi le taaloga. Sa la
nonofo faatasi ma Tama ma isi tagata uma o le aiga.
Sa 'ai e Natano ana meaai i le vave na te mafaia. Sa
manao o ia e toe foi i lana taaloga.

"Faafetai! Sa manaia le meaai." Sa oso ese o ia mai
le laulau.

"Faatali ea, sole," o le tala lea a Tama. "Ma te fia
talanoa ma Tina ia te oe."

A-oi! Pe sa i ai se faaletonu ia Natano?

Ina ua uma ona aai isi tagata uma, sa nonofo Tina



ma Tama i le laulau faatasi
ma Natano.

"Ua ma matauina ua e
faaluina le tele o le taimi
e taalo ai i taaloga vitio," o le tala lea a Tama.

Sa feminoia'i Natano. "O ni mea malie tele."

"E sa'o," o le tala lea a Tina. "Ae e malie foi isi mea.
Sa matou misia oe ananafi a o matou taaalo o se aiga
i taaloga. E tele atu lo matou fiafia pe a e faatasi ma i
matou!"

Sa taalo Natano i se tulaga ponesi matagofie o le
po anapo. E oo atu i le taimi na ia faatoilaloina ai, ua
uma taaloga a lona aiga. Sa ia lagona sina faanoanoa
sa ia misia.

Sa faauu Natano. "O lona uiga la e le o toe faataga-
ina ona ou taalo i taaloga vitio?"

"Ma te le o fai atua lena mea," o le tala lea a Tama.
"Ma te mananao ia e nofouta atili i le tele o le taimi e
te faaluina ai. Ma ia mautinoa latou te le o taofia oe
mai isi mea taua, e pei o feau ma meaaoga ma sue-
suega o tusitusiga paia."

Sa tilotilo i lalo Natano. "Ou te masalo sa ou misia
nisi o mea."

"Ma te mautinoa e mafai ona e fuafuaina pe faape-
fea ona maua se paleni sili atu," o le tala lea a Tama.

"E mafai ona lua fesoasoani mai?" O le fesili lea a
Natano.

Na ataata Tina. "Ioe."

Sa filifili faatasi Natano, Tina, ma Tama i le tele
o le taimi o taaloga vitio e tatau ona faia e Natano

i aso taitasi. O lea sa latou mafafau ai i se
fuafuaga. O le a latou tuuina se pepa lautele
o i ai se molitaofi i autafa o le TV. Afai e mafai
e Natano ona taofi le taalo ina ua valaau atu

Tina ma Tama ia te ia, o le a ola le molitaofi i le lanu
samasama. Afai e sili atu ma le faa-tasi ona la fesili
atu ia te ia, o le a lanumumu. Ma afai e mafai ona
ia taofi na o ia ae latou te lei fesili atu, o le a alu i le
lanumeamata.

O po taitasi a o lei oo i le taimi e momoe ai, latou
te talanoa pe na faape'i mai Natano i lena aso. Afai
na lanumumu le molitaofi, o le a itiiti sona taimi e
taalo ai i le aso e sosoo ai. Ae afai e tumau ai i le
lanu meamata, o le a ave o ia e Tina ma Tama i le
falemataaga o le vateatea!

Na iloa e Natano o le a faigata ona suia ona
mausa. Ae sa saunia o ia mo le lu'i.

Mo nai aso muamua, sa tumau ai pea le molitaofi
i le lanu samasama. Ona sasi lea o Natano, ma sa
tatau ona alu i le lanumumu. Sa manao o ia e tau-
mafai malosi atili i le isi taimi. O le aso na sosoo ai,
sa ia setiina ai se faailo ina ia ona iloa le umi o lana
taalo. Mulimuli ane, sa ia oo atu i le lanumeamata!

Ina ua mavae ni nai aso lanumeamata, sa ave o
ia e Tina ma Tama i le falemataaga o le vateatea.
Sa sioa atu Natano i se roketi tele. Sa foliga mai o le
roketi i lana taaloga, ae sa sili atu. Sa ataata o ia. Sa
manaia le i ai iinei ma Tina ma Tama. Sa manao o
ia e vaai po o le a le umi e mafai ona ia nofo ai i le
lanumeamata! ●

O lenei tala sa tupu i le ISA.



E
mafai ona
e faia lau lava
fuafuaga e pei
ona faia e
Natano!

Tala-
noa i ou
matua mo
se feso-
soani.

